

REGIONAL NEWS

HEADLINES:-

1. Naktuka Mizorama Village Council leh Local Council inthlan vote thlak turin ruahmanna engkim peih fel a ni tawh.
2. Mizoram Lokayukta Chairperson Pu Lalmalsawman vawiin khan Governor Gen Retd Vijay Kumar Singh hnenah Mizoram Lokayukta Fifth Annual Report 2023-2024 a hlan.
3. Prime Minister Narendra Modia chuan India chu kum 10 kalta chhungin khawvel economy lian tehnaah panganaah a inhlankai tawh a ti
4. Vawiin khan Paris khawpuia Grand Palais ah khawvel huap AI chugnchang sawihona AI Summit tan a ni.

<><><>

LC ELECTION

Naktuka Mizorama Village Council leh Local Council inthlan vote thlak turin ruahmanna engkim peih fel a ni tawh.

Akashvani corr zawhna chhangin State Election Commissioner Dr. H. Lalthlanglana chuan Mizoram hmun hrang hranga Village Council leh Aizawl leh Lunglei-a Local Council inthlan chu naktuk zing 7 atanga tlai dar 4 ah neih a nih tur thu a sawi a. Vote hi zan dar 7 atanga chhiar tur niin polling station tina RO ten result an puang dawn a ti a, vawiin khan district hrang hranga polling party ten polling station an pan tih a sawi bawh.

Dr. H. Lalthlanglana chuan Local council leh Village council inthlanna lo awm turah mipuiten vote an thlak ngei theih nan ruahmanna hrang hrang siam a nih thu sawiin vote nei zawng zawngte vote thlak ngei turin a sawm a. Democracy chu mi zawng zawng mi lian leh mi te inang tlanga sorkar an siam theihna awm chhun ani tih sawiin vote thlak vek turin mipuite a sawm a ni.

Naktuk-a Village Council Inthlan vote thlak inpuahchahna kal zelah District dangah pawh vawiin pisa tual atangin an duty-na hmun tur an pan a.

District thuneitute ruahmanna in Polling party kal chhuak turte hian DC office-a Dispatch Counter atangin inthlan buatsaihna tur hmanrua leh bungruate lam khawmin, an bungruate an endik fel vek hnuah an duty-na tur hmun panin an chhuak a. Polling Party-ah hian inthlan huaihawttu tur Returning Officer (RO)-te, inthlan buaipuitu tur Presiding Officer (PRO) leh Polling Officer (PO)-te, venhimna hna thawh tur security-te leh lirthei khalhtute an tel a ni.

Hetih lai hian Lunglei District-a Lalnutei ah candidate a boral avangin ni 13 hian vote thlak a ni dawn a. Lawipu Veng-ah nizan khan Local Council candidate congress party a boral avangin vawiin khan Lawipui veng inthlan hun hi sawn niin, ni 14 (zirtawpni) ah hemi bial ah hian inthlanna neih a ni ang. Autonomous District Council awmna tiam lovin, Mizorama district 9-ah hian VC 544 awmin bial 2,416 a awm a. Bial 1,803 te hi tu pawhin chuh theih a nih laiin bial 613 hi hmeichhe tana hauh bik a ni. Bial 2,416 chuh tura hming pelut hi mi 6,829 awmin candidate

5,178 te chuan tu pawhin a a chuh theih bial an chuh a, hmeichhe tana hauh bik bial chuhtu hi mi 1,651 an ni.

Aizawl Municipal Corporation (AMC) huam chhungah hian LC 87 awmin bial/member 575 a awm a, bial 418 chu duh duh chuh theih niin bial 157 chu hmeichhe tana hauh bik a ni. AMC huam chhunga LC inthlan chuhtu hi general seat-ah mi 1,211 leh hmeichhe tana hauh bik chuthu mi 448 an awm a ni.

Lunglei Municipal Council (LMC) huam chhunga LC 24-ah hian bial 148 awmin mitin chuh theih bial 110 leh hmeichhe tana hauh bik bial 38 a awm a. Mitin chuh theih bialah candidate 309 awmin hmeichhe bial bik chuhtu 108 an awm bawk a. LMC hnuaia LC te hi an inthlan hmasakna ber tur a ni.

<><><>

LOK AYUKTA

Mizoram Lokayukta Chairperson Pu Lalmalsawman vawiin khan Governor Gen Retd Vijay Kumar Singh hnenah Mizoram Lokayukta Fifth Annual Report 2023-2024 a hlan a.

Annual report hian April ni 1, 2023 leh March ni 31, 2024 inkar a huam a, Mizoram Legislative Assembly-ah pharh a ni dawn a ni.

Governor chuan Mizoram Lokayukta Chairperson Pu Lalmalsawma bakah hian Pu Lalsanglura, Member leh Pu Joel Joseph Denga, Member (Judicial) te chu an hmalakna hrang hrangte sawipuiin, Chairperson-in Mizoram Lokayukta dinhmun leh hmalakna tlangpui a tarlang a. Mizoram Lokayukta hnuaia case neih dan leh bawhzui dante bakah dinhmun leh thlen chinte Governor hi an hriih bawk a ni.

Annual report-in a tarlan dan chuan kum 2023-2024 chhung khan Mizoram Lokayukta hnuaiah eirukna thubuai case 8 ziahluh a ni a; heng case 8 te hi preliminary inquiry tura tih niin, heng zinga case 7 te report hi dawn tawh a ni. March 2019 a Mizoram Lokayukta din a nih atanga nimin February ni 10, 2025 thleng khan Mizoram Lokayukta hnuaiah case 71 ziahluh tawh niin, heng zinga case 46 te hi chhuizui tlaka ngaih a ni a. Case hearing tum 38 neih tawh a ni a, thiamloh chantir 4 leh thiam chantir 1 an awm tawh a. Department proceeding tura tih case 3 a awm tawh bawk.

<><><>

GOVERNOR

Governor Gen Retd Vijay Kumar Singh an Department pali; Rural Development, Agriculture, Animal Husbandry & Veterinary leh Fisheries Department hotute chu Raj Bhavan-ah a hran theuha kawmin Sawrkar laipui scheme pawimawh tak tak hnuaia an hmalaknate leh harsatna tawhte a sawipui a ni.

Governor chuan hmasawnna kawnga pawimawh tak, Sawrkar laipui scheme hrang hrang hnuaia Mizorama hmalaknate hriat chian mai bakah, harsatna tawhte Sawrkar laipuia bawhzui thuai a nih theih nana meeting koh a nih thu a sawi a. Mipuite'n an tana ruahman hamthatna hrang hrangte an hriat chiana an chhawr tangkai theih nan scheme chungchang a pawimawh hriihhriat leh chhawmdawl kawnga theihtawp chhuah zel turin department hotute a chah a ni.

Governor chuan scheme tangkawp theite pawtkhawma hmasawnna ruhrel tha leh rotling siam ngaihpawimawh a tul thu sawiin, Mizorama Self Help Group-te thil siam chhuah, sawngbawl dan leh zawrh tura chhawpchhuah a nih dan chu fakawm a tih thu a sawi a. Hmasawnna

rahbi thar, loneitute tana tha zawk leh thlanawm tak ngaihtuah zel tura chahin, organic thlai thar chhuah kawngah tan la turin a fuih a. Ran hriselna ngaihpawimawh a tul thu leh sangha thar chhuah kawnga hmalak a tul thu a sawi a. Department hotute chu langtlang leh rintlak zawka hmalak a nih theih nan digitization ngaipawimawh tel turin a chah bawk.

<><><>

FLOWER SHOW

Pangpar zuar Association buatsaih Flower Show cum Fair chu vawiin atang khan Aizawl Club Park ah neih a ni a, fair hi Inrinni thleng neih a ni ang.

Flower Show ah hian pangpar zuar mi 80 an in pho a, pangpar zuar bakah lei tha leh pot zuar inpho an awm bawk a ni.

Pangpar zuar Association Secretary Jacob Lalrinawma chuan pangpar zuar association member te chu pangpar zawrh hmanga eizawng, chhungkaw chhawm an nih thu sawiin fair an buatsaih thin chu mipui ten an hlutpui avangin an hlawkpui thin hle thu a sawi. Pangpar zuar Association ah hian member 300 chuang awm mekin, kumtin flower fair hi vawi 5 an buatsaih thin a ni.

Pangpar zuar Association hian ni 5 chhung awh fair chu a tam thei ang ber chhim turin mipuite an sawm a ni.

<><><>

CHAMPHAI

Champhai Veng pakhata naupang kum 4 mi chu a Nu hnathawh hlana lo awmsaktu in a lo sawisa a, Police in manin vawiin khan Champhai District Court a kalpui a nih hnuah Champhai District Jail ah khung nghal a ni

Champhai District Child Protection Officer Pi Lalrinchhani hnen atanga thu dawn danin Champhai Venglaia a khawsak mek, Lalruatpari, kum 24 mi chuan nimin khan he naupang hi a sawisaa, a taksaah hliam a tuar nual a, naupang Nu hnathawh hlanin thlakhat chhung a lo awm sak tawh a, tum dangah pawh naupang hi a lo khawih fo tawh thin nia hriat a ni.

Champhai District Child Protection Unit ten report an dawn bawhzuiin naupang hi a rang thei ang bera lain medical investigation leh tul ang angte an buaipui nghal a, District Hospital, Champhaiah dah luh a n a, Child Welfare Committee uin First Information Report Champhai Police Station ah thehlut nghalin Naupang sawisatua puh hi an man ta a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan India chu kum 10 kalta chhungin khawvel economy lian tehnaah panganaah a inhlangkai tawh a ti. Vawiina internet kaltlanga India Energy Week 2025, Yashobhumi, Dwarka-a a hawnnaah he thu hi sawiin Pu Modia chuan India chu economy lian tehnaah hian 10-na atangin 5-naah a invawrh chho a ti a. Kum 10 chhung vekin ni zung chakna hmanga kawlphehtha siam solar energy generation chu a let 32-in a pung a ti a. Khawvela solar power siam hnem ram pathumna a ni a ti a. Non-fossil fuel energy siam chhuah lamah a let thumin a puang a, Paris Agreement-a tel G20 ram zingah hetiang dinhmun thleng thei hmasa ber a ni a ti bawk

Prime Minister hian Make in India hmalakna tarlang bawkin tualchhunga mamawh che vel leh thilsiam chhuahna lamah ram chak takin hma a sawn a ti a. Kum 20 lo awm leh tur chhungin India chu ram changkangah a inhlangkai ang a, kum 5 lo awm tur chhungin mellung pawimawh tak tak a thleng ang a ti bawk.

<><><>

BUDGET DISCUSSION

Vawiin khan Rajya Sabha leh Lok Sabha-ah General Budget 2025-26 sawiho chhunzawm a ni a. Lok Sabha ah chuan Samajwadi Party hruaitu Akhilesh Yadav chuan mipui hamthatna tur scheme te chuan mi nawlpui a thleng phak lo a ti a. Sawrkar chu Viksit Bharat hmathlir leh loneitute sum lakluh a leta tihpun kawngah hmalak dan tur mumal a nei lo a ti.

Hetihlai hian BJP MP Hema Malini chuan ramchhungah hmeichhia leh loneituten hmasawnna chak tak an hmu a ti a. Thingtlanga zirna in te an thang zel tih sawiin damlo enkawlrate pawh a changtlung tawh hle a ti bawk.

<><><>

AI SUMMIT

Vawiin khan Paris khawpuia Grand Palais ah khawvel huap AI chugnchang sawihona AI Summit tan a ni a. He hunah hian Prime Minister Narendra Modia chu French President Emanuel Macron nen Co-Chair an ni a. PM Modia chuan thusawiin artificial intelligence AI theihna chu sawrkar tha siamna leh hmasawnna huapzo neih nan a pawimawh a ti a. President Macron-an AI Summit a thleng chu lawmawm atih thu sawiin eibar zawнна, venhimna leh khawtlang nunah nghawng tha tak a thlen ang a ti.

<><><>